

Te Heheuraa Api

E ITE I'A OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 8

-- ATETE 1949 --

MAT. 36.

E PARAU NA TE PERESITENI NO TE EKALESIA

A HAAAPAO I TE MAU FAAUERAA.

E mea maitai, i te tahi mau taime, ia hi'opoa tatou i te mau parau ta te Fatu i parau atu i te mau tamarii a Iseraela, na roto ia Mose, a tere noa'i ratou na roto i te medebara. I rotopu i te reira mau parau te tapao nei au i teie mau faaueraa ta'na i horoa, mai teie te huru:

Eiaha oe e faahiti faufaa ore noa i te i'oa o to Atua ra o Iehova; e ore hoi Iehova e faatia ia'na i tei faahiti faufaa ore noa i to'na ra i'oa. (Exodo 20:7)

Te tiaturi nei au e, eita roa te mau melo no te Ekalesia e riro ei feia haapao ore i te tuu noa raa, i roto i to ratou mau vaha, i te i'oa mo'a o to tatou Metua i te ao ra.

Ua parau atoa oia e: *E haamana'o i te mahana Sabati ia haamo'ahia.* (Exodo 20:8) Ia hi'o noa'tu, e ohipa iti mau te reira te tia ia tatou ia rave ei faaho'iraa'tu no te mau maitai ta tatou i farii. Area ia haamo'e i te reira ei mahana na te Fatu, mai ta te tahi pae e rave nei, e ohipa tia-ore-roa te rei-

ra. Ua faataa oia i te hoê mahana, no roto mai i na mahana e hitu ra, eiaha ei utu'a na tatou, ia faatae ra te oaoa i roto i to tatou mau oraraa e ia riro to tatou mau utuafare ei haaputuputuraa na te mau tamarii e ei faarahiraa i to tatou here, te tahi i te tahi. E mai te mea e haapao tatou i te hinaaro o to tatou Metua i te ao ra e haere ia tatou i to'na fare mo'a, i te mahaea Sabati, a rave atu ai i te oro'a ei haamana'oraa no te tusia tei ravehia no tatou e te Taraehara o te taata nei.

Mai te mea e *haamana'o tatou i te mahana sabati ia haamo'ahia*, e horoa mai te reira i te oaoa rahi e e horoa atoa mai to tatou Metua i te ra'i ra i te mau haamaitairaa no to tatou haapaoraa i ta'na a'o e ta'na parau faaite.

E i muri iho ua parau faahou â oia e, *E faatura'tu i to metua tane, e to metua vahine; ia haamaorohia to oe pue mahana i te fenua ta to Atua ta Iehova e horoa na oe na.* (Exodo 20:12) I roto i to'u iho mana'oraa ra, e ere i te mea tia ia parau atu i te reira parau i teie nei nunaa.

E haamaitairaa mau te reira. O te hoê ia te reira o te mau oaoaraa o to'u nei oraraa ia ite au, e ua rave au i te hoê mea tei horoa i te maitai no to'u metua tane e to'u metua vahine. O te reira ia to'u huru a vai ai raua i õnei, e i teie nei ra tei õ mai raua, te hinaaro nei au ia faatano i to'u nei oraraa ia noaa ia raua te tura e te hanahana ia tae i te mahana e farii mai ai raua ia'u i roto i to raua utuafare.

Eiaha roa oe e taparahi noa i te taata. (Exodo 20:13) Ua rahi te mau taata o teie nei ao tei ore i papu i te rahi o te i-no ia taparahi noa i te hoê taata. E i roto i te mau ohipa ino ta te taata e rave nei, aita'tu e hara, te ravehia nei e te taata, tei faaatea ia'na i te mau haamaitairaa o te basileia Tiretiera, maori râ te hoê atu hara tei parauhia mai, oia hoi, te faainoraa i te Varna Maitai. E mea tia roa ia haapii atu ta-

tou i ta tatou mau tamarîi, i to ratou apî-roa-raa e i to ratou hoi paariraa, te tura o te oraraa o te taata nei e te rahi o te ino o te hara taparahi taata.

Eiaha roa oe e faaturi. (Exodo 20:13) I to tatou mau mahana nei e au ua haere ê roa te mau taata i taua vahi ra. Ua rave rahi roa te mau taata tei mo'e ia ratou te tura e te mo'a o te oraraa viivii ore e tei haamo'e i te mau manuiaraa ta te Atua i horoa mai nō te faarahiraa i to ratou mana, no te oaraa no ratou iho, i roto i te oraraa nei, e i te faataeraa'tu i te reira ia vetahi ê ra. Ua haamo'e ratou i to ratou paieti mau no te faatiaraa i to ratou mau hinaaro tia ore ra, e i te hopea ra ua faataa ê ratou, ia ratou iho, no te hoaraa o te Varua o to tatou Metua i te ao ra e ua apee atu i te faahema tei hinaaro i te haamou ia ratou ra.

E te mau Feia Mo'a no te Mau Mahana Hopea Nei, a haapii atu i ta outou mau tamarîi ia haapao maitai i te mau ture no te pae morare ia ore ia tupu, i roto ia ratou ra, te hinaaro ia amui atu i te mau faahemaraa o te ino ra. Te vai nei te hoê ohipa rahi a'e i te tonoraa'tu ia ratou i te Haapiiraa Sabati, i te Paraimere e i te mau ohipa a te Feia Apî e i te tahi atu â mau putuputuraa o te Ekalesia. Teie te ohipa tei vai i mua ia tatou, te mau metua tane e te mau metua vahine, oia hoi, te haapiiraa e te aratairaa ia ratou i nia i te e'a o to tatou Metua i te ao ra, ia tia ia haroaroa maitai ratou i te mau mea paari, e te rahi hoi, te farereihia e ratou i roto i to ratou oraraa.

Eaha te huru o te tiaraa maitai o te mau metua ia parahi ratou i roto i to ratou iho mau utuafare ma te faaatihia e te mau tamarîi viivii ore, tei horoahia mai ia ratou, e to tatou Metua i te ao ra, tei faafanau hoi ia ratou i te pae varua! Eaha te huru o te oaoa e noaa mai ia amui ratou i roto i te faariiraa i te mau haamaitairaa a to tatou Metua i te ao ra e i te

riroraa ei hoa no To'na Varua, a haapii atu ai ia ratou, i to ratou apîraa no to ratou hoi paariraa, a tapea noa'i ratou i te viivii ore o to ratou oraraa ra!

Te tiaoro atu nei au ia outou ia paruru maitai outou i teie nei u'i apî e haere mai nei, na roto i te faarahiraa i to tatou feruriraa, to tatou faaoromairaa i to mutaa iho ra, ia ore ratou ia mairi i roto i te mau apoo tei tuuhia i mua ia ratou ra e te enemi ra.

Aita te rahiraa o te mau hoho'a cinema, te mau parau e parauhia nei i roto i te radio, te mau hoho'a i roto i te tahi mau buka hoho'a e te tahi hoi mau buka aamu i au maitai no te hoê amuiraa maitai, e ia ore noa'tu tatou e tamata i te faao-re i te reira na roto i te mau haapiiraa e te mau peu maitai atoa hoi o te horoa'tu i te u'i apî te mau ite no te mau taata maitatai tei haapii atu ia ratou i te mau maitai o te mau peropheta e te auraa mau no te Evanelia a Iesu Mesia, no te mea e hi'a paha te tahi pae o ratou, ta tatou i here mau, e ia taere noa'tu tatou i roto i tana ohipa ra e noaa ia ia tatou te ite e, ua varea tatou i te taoto.

A haapii ana'e tatou i ta tatou mau tamarii ia vai viivii ore noa ratou i roto i to ratou oraraa e ia riro ratou ei feia afaro maitai. A haapii atu i ta tatou mau tamarii tamaroa ia paruru i te paieti o to ratou mau tuahine e o to ratou mau hoa tamahine atoa ra. A haapii atu i ta tatou mau tamarii tamahine ia paruru i te paieti o te mau tamaroa ta ratou e amni atu na roto i to ratou faatia-ore-raa i te mau peu au ore.

E ere ana'e i te ohipa na tatou i te haapii atu, e i te haapao hoi, i te Evanelia a Iesu Mesia, ia tono atoa'tu ra ia ratou na roto i te ao nei, ia titauhia ra ratou, no te raveraa i te ohipa Mitinare i roto i te Ekalesia. Ia haere atu ratou e mea tia roa ia haapiihia ratou ia ore roa ratou ia pee noa'tu i te mau faahemaraa a te enemi. Ia vai viivii ore noa ratou, e te

mâ maitai atoa hoi, i roto i to ratou oraraa ia hi'ohia mai te reira e vetahi ê ra. Eita roa te Varua o te Atua e parahi i roto i te hiero viivii ra, e parahi ra to'na Varua i roto i tei vai mâ noa. No reira a faaamu ana'e tatou i ta tatou mau tamarii i raro a'e i te ûrûraa o te Varua o te Atua ia ore roa te enemi ia mana i nia ia ratou e ia aratai ê atu hoi ia ratou ra.

Eiaha roa oe e eiâ. (Exodo 20:15) O teie atoa hoi te tahi o taua mau ture ra. E mea maere mau ia hi'ohia te rahiraa o te mau tane, e te mau vahine hoi, tei ora i te hoê oraraa maitai, tei pee atu i te faahemaraa ia rave i te tahi mau mea aita to ratou e faturaa i te reira. I roto i teie mau matahiti i pau a'enei ua haere tatou na roto i te tahi faahuru-ê-raa rahi. Mai te mea ra e, ua haapao-ore-hia te ture no te haapao-maitai-raa. Ua ite to tatou Metua i te ao ra e, te vai mau ra te tia ia horoahia mai te reira ture. Aita te reira i horoahia mai ia papai noa hia i roto i te mau papairaa mo'a, a vaiiho ai i te reira i nia i te paepae ra. Ua horoahia mai ia porohia na nia i te tapoi o te mau fare ra, mai te mea te vai ra te tia ia na reirahia.

Ua horoahia te reira ture ia Iseraela tahito ra, e ua faataahia te utu'a, i taua mau mahana ra, no te feia te ore e haapao i te reira. Te vai mana noa nei teie ture i nia iho ia tatou nei e te parau atu nei au ia outou e, te utu'a te tuuhia nei, i nia i te taata tei ore i haapao i taua ture ra ia tuuhia ratou i mua i te mau haavâraa o te fenua nei, e mea iti roa ia ia faafaitohia i te utu'a pae varua te tuuhia i nia ia tatou tei faahapa i taua ture a te Atua ra.

Eiaha roa oe e pari haavare ia vetahi ê. (Exodo 20:16) Tei roto atoa ia te reira i taua mau ture ta to tatou Metua i te ao ra i horoa i te mau tamarii a te taata nei. Te tiaturi nei au e, eita te hoê melo no teie nei Ekalesia e faahaehaa ia'na iho no te faainoraa'tu i te hoê taata ia noaa mai te hoê mai-

tai. Te tiaturi nei au e, eita tatou e farii haapao ore noa i te parau no te hoê taata, na te tahi ê atu e parau mai, a haapurara atu ai i te reira na roto i te amuiraa no te faatupuraa i te ino e te haama o te hoê tane, e a ore râ, te hoê vahine maitai, e a ore râ, no te hoê tane, e a ore râ, no te hoê vahine ino, mai te mea e parau haavare te reira.

E mea tia roa ia faariro tatou, ia tatou iho, ei faïto tia mau. E mea tia roa, i te mau feia paari o te Ekalesia, ia faatura ratou i to ratou mau tiaraa i roto i te amuiraa, e ia tupu noa' tu te mana'o ia faahapa, ia faaite i to te tahi hape e ia faa-ino hoi i te mau feia te tamata nei ia rave i te maitai i roto i teie nei ao, eiaha ratou e parahi mamu noa e te mata'u hoi, ia faaore râ ratou i te reira na roto i te varua o to tatou Metua i te ao ra na roto i to tatou faaho'iraa i to ratou huru mau, te mau taata tei faaino atu i to ratou mau taata tupu.

I roto i teie nei tau peapea rahi ta tatou e haere nei, a vai noa'i te papu ore, te vai nei te titauraa ia rahi te mau tane e te mau vahine maitai tei tapea tamau noa i te roo maitai o to ratou mau taata tupu ei faufaa rahi. E mea tia roa ia faatupu tatou, i roto ia tatou iho, te hinaaro ia haamaitai atu ia vetahi ê ra e ia haavî atu i te mau feia ta tatou e amui atu ia parau ratou i te parau ino no vetahi ê ra. Te tiaturi nei au e, i to te Fatu horoaraa mai i te reira ture i to Iseraela i tahito ra ua mana'o oia e, e ite tatou i te reira e e tauturu tatou i te faatupuraa i te reira na roto i te haavîraa i te haaparareraa i te mau parau haavare, i tera taime e i tera taime.

Ua parau faahou â te Fatu e, *Eiaha roa oe e nounou i to vetahi ê ra fare, eiaha atoa oe e nounou i ta vetahi ê ra vahine, e to'na tavini tane, e to'na tavini vahine, e ta'na puaatoro, e ta'na asini, eiaha atoa i te mau mea atoa na vetahi ê ra.* (Exodo 20:17)

Oia hoi, ua horoa mai to tatou Metua i ao ra i te reira ture. E mea tia roa ia oaoa i te mau mea atoa tei tae mai i roto i

to tatou mau rima na roto i ta tatou iho mau raveraa ra. E mea tia roa ia oaoa tatou i te reira i te pae tino nei. Area, i te taime mau tatou e nounou atu ai i ta vetahi ê ra, i te taime mau tatou i hi'o atu ai i te mau ravea e roaa mai ai i ta vetahi ê ra e ô mai ai te nounou i te mau mea a vetahi ê ra, i te reira mau taime e ore ai ia tatou te ûrûraa, i roto i to tatou oraraa, o te Varua o to tatou Metua i te ao ra.

Te feia tei faahapa i te reira ture a to tatou Metua i te ao ra, noa'tu i te rahiraa, e a ore râ, te itiraa, ua haere ia ratou i roto i te fenua o te diabololo, e o teie mau â te taime i tia'i ia tatou, te mau melo no teie nei Ekalesia, te ora nei i roto i teie nei anotan, ia ite maitai mau i te reira.

Tihoti Arapera Semita.

EDITORIAL

TE TAMATARAA I TO TATOU TURU-MAU-RAA.

Te hoê o te mau ture rahi o te Evanelia a te Mesia o te TURU-MAU-RAA. I roto i to te Faaora raveraa i te ohipa i te pae tino nei ua titau noa oia i te turu-mau-raa o te mau feia tei pee ia'na. Ua faariro mau oia i te reira ei tumu mau no te ture rahi matamua ta'na i tuu mai, oia hoi, *ia here tatou i to tatou Atua ma to tatou mau mafatu, to tatou puai e to tatou itoito atoa.* O te reira huru faito here te ore roa e faatioihia, o te huru mau ia o to tatou tururaa ta te Atua i tia i te taata nei. E haere te reira peu, eiaha i roto ana'e i to'na hereraa i te Atua, i ta'na atoa ra mau faaueraa e ta'na atoa hoi mau tavini i faatiahia i nia i te ao nei. To tatou huru mau o te faito mau ia o to tatou tururaa.

I te tahi taime, a parau ai o Iosepha F. Semita no nia i te reira, ua parau mai oia e, *Na roto i te ture no te tafaa ahuru*

e tamata-mau-hia'i te tururaa o te mau melo o teie nei Ekalesia. Na roto i te reira ture e itehia e, o vai mau te hinaaro i te basileia o te Atua, e te feia te patoi mai i te reira. Na roto i te reira ture e itehia'i to vai te mafatu tei tae i te faito no te haapaoraa i te hinaaro e te mau faaueraa o te Atua, e te mau feia te patoi i te reira ua faaere ia ratou, ia ratou iho, i te mau haamaitairaa no Ziona. E faufaa rahi mau te vai nei i roto i te reira, no te mea, na roto i te reira e itehia'i e, o vai mau tei haapao i te reira e o vai hoi tei ore i haapao i te reira.

Ia vai mau te reira, mai te faaroo i te Atua, mai te tatara-haparaa i te mau hara, mai te bapetizoraa no te haamatara-raa i te mau hara, mai te tuuraa o te rima no te horoaraa i te Varua Maitai. Mai te mea e haapao te hoê taata i te mau ture, a haapao ore ai i te hoê noa iho o te reira mau ture, ua hara ia oia i reira, ua riro ia oia ei taata ofati ture e ua ore to'na tiaraa no te fariiraa i te mau haamaitairaa o te Evanelia a Iesu Mesia. Ia haapao râ te hoê taata i te taatoaraa o te mau ture, tei horoahia mai ia'na, mai te au i to'na itoitoe, to'na huru e to'na ite, noa'tu e, e mea iti ta'na e rave ra, e mea maitai roa te reira i mua i te aro o te Atua, mai te mea ra ua haapao i te mau mea tei hau roa'tu i te rahi.

To tatou huru i mua i te PARAU PAARI e faito atoa ia te reira i to tatou tururaa. Ua horoahia mai, ia tatou, te Parau Paari ei parau e ei hinaaro o te Fatu. Ua tae anei to tatou nei tururaa i te fariiraa i te reira mai te au i to'na horoaraahia mai? Ua tae anei to tatou tururaa i te haapao i te parau a te Atua, oia hoi, eiaha tatou e inu i te tî, te taofe e te ava e eiaha e puhipuhi i te avaava, e ia ora tatou ma te haapao i te mau haapiiraa tei tuuhia mai i roto i taua ture rahi ra?

To tatou haapaoraa i te faaturaraa i te mahana SABATI, o te tahi atu â ia faito mau o to tatou tururaa. Te hinaaro anei tatou ia haamo'a i taua mahana ra, e a ore râ, ua hinaa-

ro anei tatou i te faaau i te parau—haere i te pureraa i te tahi pae o te mahana e ia ofati i te mahana Sabati i te toea o te mahana ra? E ere i te peu Cherisetiano mau i te haapao i te tahi pae o taua mahana ra ei mahana mo'a, e ia haapao i te toe o taua mahana ra no te imiraa i te arearea e te faufaa. Tei hea to tatou tiaraa? Tei te pae anei tatou o te Fatu, o te pae ia o te mahana Sabati, e a ore râ, tei te pae anei tatou o mamona, oia hoi, te pae o te mau arearea e te parautia ore? Teihea to outou tururaa i te vairaa?

E tia ia tatou ia haere na roto i te tahi atu â mau faaueraa a te Fatu a tamata atu ai i to tatou tururaa na roto i to tatou haapaoraa i te reira mau faaueraa. Mai te mea e haapao maitai tatou ia ratou, e feia paturu mau ia tatou; ia ore ra tatou ia haapao maitai ia ratou ua tia roa ia ia feruri tatou i nia i to tatou tururaa. Ua tia roa ia, i te reira taime, ia ui tatou, ia tatou iho, e haapao anei tatou i te reira ture rahi ra, oia hoi, ia here i to tatou Fatu, to tatou Atua, ma to tatou mafatu atoa. Ua faaau te Fatu i te parau ra, here ia'na, i te faaroo e te haapaoraa ia'na. Ua faaite mai te Fatu e, mai te mea te vai ra ia tatou ta'na mau faaueraa e mea tia ihoa ia haapao tatou i te reira. Ua parau mai oia e, *Te taata tei ia'na ta'u mau faaueraa e ua haapao i te reira, o tei here ia ia'u.*

To tatou tururaa i te Fatu, ia faaau-atoa-hia te reira i to tatou tururaa i te mau mono o te Fatu i nia i te ao nei. Eita roa e tia i te hoê taata ia here i te Atua a inoio âtu ai i ta'na mau tavini. Mai te mea ua here tatou i te Fatu e mea tia roa ia here atoa tatou i te feia ta'na e tonono mai, i te ao nei, no te mono ia'na. Ua riro mau te mau tavini o te Fatu ei hoho'a no te mau ture ta te Fatu iho i riro ei hoho'a, no reira, mai te mea ua here tatou i te reira mau ture e mea tia roa ia here atoa tatou i te mau taata tei mono ia ratou, mai te Fatu atoa tei horoa mai i te reira.

TE VARUA O TE PURE

Ua rave rahi te haapiira tei haapiihia a'enei, e te mau Feia faatere o te Ekalesia, i tera tau e i tera tau, no nia i te pure. I te tahi taime a aparau ai o Iosepha F. Semita no nia i taua tumu parau ra, ua na ô mai oia e:

A haapao maitai i taua ture rahi ra tei horoahia mai e te Orometua rahi, oia hoi, ia haamana'o i te Fatu, ia pure i te poipoi e i te ahiahi atoa hoi no te mau maitai tei fariihia i te mau mahana atoa ra. A na reira mau ihoa tatou, i roto i te paari e te parau-tia, e ia pure tatou a tiaoro atu tatou ia'na mai te papu e te tia hoi. Eiaha tatou e ani atu i te Fatu no te mau mea tei ore i hinaarohia e te ore hoi e au no tatou. E mea tia ia ani atu tatou no te mau mea te au maitai no tatou e ia ani atu tatou i te reira ma te faaroo, eiaha ma te feaa, no te mea te taata te feaa, mai ta te aposetolo i parau mai, e patuhia ia oia mai te are miti e fetoitoti a'era. Ia ani atu tatou i te Atua no ta'na mau haamaitairaa, a ani i te reira na roto i te faaroo i te Evaneria, i roto i taua faaroo ta'na i parau e, e horoa oia i te reira i te taata tei tiaturi ia'na e tei haapao i ta'na mau faaueraa.

E mea tia roa ia vai noa ia tatou nei te varua o te pure i roto i te mau ohipa atoa ta tatou e rave i to tatou oraraa nei. No te aha e mea tia ia na reira tatou? Te tumu rahi no te reira, i rpto i to'u iho mana'o o teie ia, aita'tu ta te taata e ravea maori ra te Atua. Aita ta te taata e hoê ravea iti a'e mai te mea aita te Atua. Eaha te rahi o te ohipa te oti ia tatou ahiri aita to'na aroha ia tatou?

Ua pinepine to'u parauraa e, eita roa e tia i te hoê taata ia faatupu i te hoê noa iho tumu iti matie ma te tauturu-ore-hia e te Atua. Ia rave ihoa tatou i teie nei ao, ia haapao tatou i te repo fenua, te mata'i o te reva, to'na mahana e te hau marû ta te Atua i faataa no te reira; e na te reira e faatia ia faatupu tatou i te tumu matie iti ra; e ua au hoi te reira i te mau mea atoa te au no to tatou nei oraraa.

Eita roa e tia ia outou ia faatupu i te hoê tumu tô papaa, e a ore râ, te hoê tumu mei'a ma te tauturu-ore-hia e te Atua. Eita e tia ia outou ia faatupu atu i te hoê mea maitai no te oraraa o te taata, e no te mau animala atoa, ma te tauturu-ore-hia e te Atua. No reira, no te aha eita e tia ia tatou ia ite e, tei te Atua to tatou nei oraraa? No te aha eita e tia ia tatou ia here ia'na ma to tatou mafatu, to tatou feruriraa e to tatou puai no te mea na'na i horoa mai i te ora, ua hamani oia ia tatou mai te au i to'na iho huru e i to'na iho hoho'a e to'na hoi tuuraa ia tatou i te hoê vahi i tia'i ia tatou ia riro mai ta'na Tamaiti fanau-tahi, e ia noaa ia tatou te hanahana, te tura e te utu'a tei faataahia na te mau tamarii a te Atua.

E
O tei
i roto
tu, n
raa.
naar
ta ta

Te
amui
ô ma
mea
toa,
i to'r
e i v
Te v
Manu

No
to e i
rama
ra na
o te t
taata
tarab
roto i
faara
ra'tu
rama
ia im
ia oh

TE

E ere roa i te ohipa fifi ia haapî i te pure. E ere te pure i te parau ana'e. O teie ia te huru o te pure mau, ma te faaroo, oia hoi, ia vai mau te huru i roto i to tatou mau mafatu e te hinaaro o to tatou varua ia ani atu i te Fatu, ma te haehaa e te faaroo, ia tia ia tatou ia farî i ta'na mau haamaitaraa. E mea tia roa ia ani atu tatou i te Fatu, ia ani tatou ia'na ma te hinaaro mau e te mafatu haehaa e te varua tatarahapa, no te mau mea atoa ta tatou i hinaaro.

Te hinaaro nei au ia ite e, te vai nei anei te hoê taata apî, no roto i teie amuiraa, e a ore râ, no te tahi vahi ê atu, tei ore i hinaaro i te hoê mea no ô mai i te Fatu ra. Teihea te varua, i nia i te ao nei, tei ore i titau i te hoê mea te tia i te Mana Hope ia horoa mai? I te haamataraa o te mau mea atoa, te mau mea atoa e vai nei ia tatou nei, no ô mai ia'na ra. Ua na roto i to'na aroha i ite ai e i faaroo taria'i tatou, i vai ai to tatou mana ia parau, e i vai ai to tatou maramarama, no te mea ua na ô mai te taata paari e: *Te vai nei te varua i roto i te taata nei; e ua horoa mai te jaaûrûraa o te Mana Hope i to'na ite.*

No reira, te mana no te ite e vai nei ia tatou, no ô mai ia i te Atua. I roto e i rapae hoi ia tatou nei e repo araea noa iho tatou nei. Te ora, te maramarama, te paari, te ite, te mana ia feruri, e mau horoaraa ana'e te reira na te Atua i te mau tamarii a te taata nei. Ua horoa mai Oia i te puai o te tino nei mai to tatou atoa puai no te pae varua. E mea tia roa, i te mau taata apî atoa, ia vai noa i roto i te hohonuraa o to'na mafatu te ite e, e tarahu ta'na i te Atua no to'na oraraa e no te mau mana atoa e vai nei i roto ia'na o tei au i te huru mau o te Atua. E mea tia roa ia titau tatou ia faarahi i te mau mana tei horoahia mai no tatou. E mea tia atoa ia faaturatu tatou i te Atua na roto i to tatou ite, to tatou puai, to tatou maramarama, to tatou paari e te mau mana atoa tei vai ia tatou nei. E mea tia roa ia imi tatou i te mau ravea no te raveraa i te maitai i te ao nei. O ta tatou ia ohipa.

Faaauhia ei reo Tahiti e Marcel Bonnet.

TE TAHI MAU MANA'O NO NIA I TE PURE I MUA I TE ARO O TE AMUIRAA.

MAi to'u apîraa mai â ua tiaturi papu vau i te pure e ua haapî noa hia te reira i roto i to matou utuafare.

I te tahi na matahiti i mairi a'enei ua faaroo vau i te hoê melo faatere no te Pŭpŭ Ahuru ma piti i te parauraa no nia i te hape o te tahi mau taata ia pure ratou i mua i te aro o te hoê amuiraa.

I roto ia'u iho ua mana'o noa vau e, te pure matamua e faaterehia i roto i te hoê putuputuraa ia riro ia te reira ei aveia no te mau ohipa e ravehia i roto i te reira putuputuraa ra. Area ua rahi roa te taata tei matau i te faahiti pinepine noa i te i'oa o te Atua i roto i ta ratou mau pure e na te reira i faatupu i te mana'o i roto ia'u e, ua na reira ratou no te mea aita ratou i papu maitai i te mau mea ta ratou i hinaaro ra.

I te tahi atu taime ua faaite mai te hoê o te mau Feia Faatere no te Ekalesia e, e ere i te mea tia ia rahi atu i te hoê faahitiraa i te parau no te terono hanahana o te Atua, ia rahi atu te faahitiraa i te hoê ra, ua faufaa ore ia te reira.

Ia pure tatou i te Fatu ia hoê noa a'e faahitiraa i to'na i'oa no te mea ua ite te Fatu e, te tiaorohia'tura oia, e ua riro te reira peu ei peu fiu ia faahiti pinepinehia.

Ua rave rahi te taata, ia pure ratou, te taupe i to ratou upoo e te pure haamarû noa e eita hoi te amuiraa e faaroo i te mau parau e faahitihia ra e i te hopea ua mo'e atoa, ia ratou iho, te varua o te pure. Ua rave rahi te taata te ore e faaroo maitai faahou, mai to ratou apîraa ra, e na roto i te reira e mo'e ia ratou te varua o te ohipa e ravehia ra, e ahiri ratou i faaroo i te parau e parauhia ra ua huru ê ia ratou i reira.

Ua rave rahi te taata, ia pure ratou, e taupe ratou i to ratou upoo a pure atu ai i roto i to tatou pute pereue e aita te hoê taata, i roto i te amuiraa, e taa e eaha te parau ta'na e faahiti ra i roto i ta'na pure. Teie ra te mea tia, ia faateitei ratou i to ratou upoo a haapuai atu ai i te pure, ia faaroo maitai e ia farii hoi te amuiraa i ta'na pure. E teie faahou â te tahi mana'o, eiaha e faaroaroa i te pure hopea no te hoê putuputuraa. E ere i te mea maitai ia roaroa na pure e piti i roto i te hoê putuputuraa.

Papaihia e to outou taeae ra o *Daniela E. Matheson.*

E TE MAU TAATA, E TE MAU TAEAE EAHA TE MEA TE TIA IA RAVEHIA E TATOU?

Hoê â te pahonoraa i te reira uiraa, i teie nei, i te mau tau matamua e e vai noa te reira i roto i te mau tau a muri atu. E mea tia ia tatarahapa te mau taata atoa e ia faaroo i te i'oa o Iesu Mesia, e ia haamori i te Metua na roto i to'na ra i'oa e ia faaoromai ratou i roto i to ratou faaroo e tae noa'tu i te hopea, e ia ore ratou ia na reira, eita ia ratou e ora i roto i te basileia o te Atua.

Ua na ô mai te Faaora: *A rave mai i tau zugo i nia ia outou, e ia haapiihia outou e au, te marû nei hoi au e te haehaa o te aau: e e noaa hoi te ora i to outou varua. Te marû nei hoi ta'u zugo e te māmā nei ta'u hopoia.* A maere noa'i te mau feia maitatai o te ao nei e a tiaoro noa'i ma te papu ore eaha ta tatou e rave? ua noaa te ite papu, i te mau melo no te Ekalesia a te Mesia, i te Evanelia i faaho'ihia mai e te na ô nei ratou e, Eaha te mau mea te tia ia ravehia e tatou?

Teie te tahi mau mea te tia ia ravehia e te mau melo no te Autahu'araa, e to ratou mau utuafare, oia hoi:

1.-Ia riro ratou ei hoho'a no te afaro maitai; ia afaro i roto i te mau ohipa atoa; eiaha e parau i te parau au ore; a faaite i te mau taata atoa ta ratou e farerei te ora nei ratou i te hoê oraraa mâ e te tura hoi. *Oia atoa to outou maramarama, ia anaana ia i mua i te aro o te taata nei, ia hi'o ratou i ta outou parau maitai, e ia haamaitai i to outou Metua i te ao ra.*

2.-A imi tatou i te mau ravea no te faatupuraa i te hau e te tahoêraa i roto i to tatou mau utuafare. Mai te mea eita e tia ia tatou ia faaore i te tama'i, te inoino e te nounou i roto i to tatou mau utuafare, nahea ia tatou i te faaore i te reira i roto i te amuiraa taata?

3.- E i muri a'e i to tatou tamataraa ia riro ei taata maitai, ma te faaatihia i te hoê utuafare maitai, e tia ia ia tatou ia rave i ta tatou mau ohipa i roto i to tatou tiaraa mono mau no te Fatu ra o Iesu Mesia, i te faaiteraa i te ao nei te mau ravea e noaa'i, i te taata tataitahi, te utuafare, e i te nunaa atoa, te hau te itehia na roto i te Evanelia i faaho'ihia mai e Iesu Mesia ra.

Ia haapotohia te reira mau parau, teie ia to ratou auraa—Te fariiraa i te Mesia ei Faaora e ei taraehara; te ite-papuraa e, te ora mau ra te Atua e o Oia iho to tatou Metua i te ao ra; te oraraa i te hoê oraraa, i te mau mahana atoa, mai te ite i te reira mau mea; te hereraa mau i to tatou mau taata tupu.

Mai te au atoa i ta te Fatu i faaite haapoto mai, na roto i te mau parau ta'na i parau, a na ô mai ai oia e: *Hinaaro oe i to Atua ra ia Iehova ma to aau atoa, e ma to varua atoa, e ma to mana'o atoa—E aroha'tu oe i to taata tupu, mai to aroha ia oe iho na.*

Mai te au i ta'u i parau a'enei, ua rave rahi te mau taata tei parau e, e mea teitei roa te reira mau feruriraa no te taata nei no te mea e mea fatata a'e te taata nei i te huru o te animala, tei aro noa no te imiraa i to'na ora i te mau mahaua atoa, no reira eita e tia ia'na ia titau atu i te reira mau mea. Ei pahonora a i te reira te parau atu nei au e, ua rahi te mau tane, e te mau vahine hoi, tei haapao maitai i te reira e tei farii i te oaoa, e na roto i to ratou na reira raa ua haamaitai a'e ratou i teie nei ao. Ua na reira te mau Pîpî i te anotau o Iesu Mesia iho, e ua milioni te mau taata tei farii i te reira mau parau, mai te reira mai â tau. Ua rave rahi te tauatini o te taata, tei itehia e tei ore hoi i itehia e te

rahi
to i t
i te l
ta ra
rara
nei i

Te
i te
te or
mau

T
I Te

Mai
Me i r
nua V
to, i t

Ua
sia i V
Tautu

Te E

Mai
Mision
pea o
tahiti
mai te
rani e
hitiaa
râ e 24

I te

rahiraa taata, tei ore roa i vî i te mau titauraa tia ore na roto i te here o te Atua. E noa'tu e ua farii te pae rahi o ratou i te hamani-ino-raa, ua tia ia ratou ia parau, mai te Perophe-ta ra o Iosepha Semita e, *Mai te mea aita e faufaa o to'u o-raraa nei no to'u mau hoa, aita atoa ia te reira e faufaa ia'u nei iho.*

Te hinaarohia nei te tahi nau milioni taata te tia ia haavî i te mau ino tei haapararehia e te mau milioni e rave rahi te ora nei i roto i te hupehupe, te inoino, te mana'o ino e te mau huru hara atoa.

Papaihia e: Davida O. McKay.

TE HAERE NEI TE EKALESIA I MUA

I Te Fenua Tinito.

Mai te au i te mau parau tei faaitehia mai i roto i te hoê ve'a no te ava'e Me i mairi a'enei, ua faarue to tatou Aposetolo ra, o Mataio Cauri, i te fenua Vaihi no te haere atu, e te Peretiteni apî no te Misioni o te fenua Tinito, i te oire ra i Hong Kong.

Ua riro te fare o te taata ra o Henry Aki, te hoê Tinito melo no te Ekalesia i Vaihi, ei Fare Orometua i taua Misioni ra, e ua faataa-atoa-hia oia ei Tauturu no te Peretiteniraa o taua Misioni ra.

Te Ekalesia i te Fenua Europa.

Mai te au i te parau faaite a William Flint Dickson, te papai parau no te Misioni Europa, ua haere roa te Ekalesia i mua i te fenua Europa. I te hopea o te matahiti 1947 te vai ra i reira e 852 Orometua, e i te hopea o te matahiti 1948 ua tae roa te rahiraa o te mau Orometua i te 1.062 tei faataahia mai teie te huru: i Baratane e 214; i Danemark e 162; i Holane e 131; i Farani e 115; i Suede e 114; i Norue e 77; i Aferica Apatoa e 75; i Purutia i te hitiaa o te râ e 56; i Techeco e 36; i Finilane e 31; i Purutia i te tooa o te râ e 24; i Suiti-Autria e 23 e i Suria e Paletetina e 4.

I te matahiti 1947 ua hoohia e 6.000 Buka a Moromona e i te matahiti 1948

ua tataipiti te reira numera i nia. Ia tai'ohia te parau faaite i nia nei ra e itehia e te vai nei e 32.772 melo no te Ekalesia i roto i na Misioni e 13 e vai nei i te fenua Europa.

I roto i teie na matahiti e piti i mairi a'enei ua baptizohia e 4.479 melo apî i roto i te Ekalesia a Iesu Mesia i roto i teie mau Misioni. Na te reira e faaite mai nei e, te haere noa nei te Ekalesia i mua.

Te Evanelia i Rotopu i te Ati Lamana.

Mai te au i te mau parau tei faaitohia i roto i te hoê ve'a no te ava'e no Tirnu i mairi a'enei te tere maitai nei te ohipa pororaa Evanelia i rotopu i te mau Initia no te fenua Amerika, no te mea i roto i teie na ava'e e pae i mairi a'enei ua baptizohia 123 taata no rotopu mai ia ratou e te mana'ohia nei e, e rahi atu â to ratou te amui mai i te Ekalesia a Iesu Mesia a te Feia Mo'a i te Mau Mahana Hopea Nei. Ua tupu mau atura te parau a te Pero-pheta ra o Ieremia tei na ô mai; "E imihia ratou no roto mai i te mau mou'a atoa, te mau aivi atoa e no roto mai i te mau ana o te mato ra."

Te Ekalesia i Tarafonia.

No te rahi o te mau melo no te Ekalesia, i roto i te reira Misioni, ua faatia te Ekalesia i na Fare Pureraa apî e maha tei tomohia i roto i te ava'e no Tiunu i mairi a'enei.

To Tatou Mau Orometua.

I te 30 no te ava'e Tiunu i mairi a'enei ua reva to tatou Peretiteni Misioni tahito, o Edgar B. Mitchell (Mitiera), to'na hoa o Ruta e ta raua mau tamarii too maha, na nia i te avion o te Taiete Trapas, no te haere atu i to ratou fenua ai'a i muri a'e i to ratou parahiraa, i rotopu ia tatou nei, no na matahiti e maha e te afa. Te faaite atu nei te *Heheuraa Apî* i to'na maururu ia raua no te mau ohipa maitatai, tei ravehia e tei faaterehia e raua a faatere ai raua i teie nei Misioni.

I taua mahana ra ua reva atoa'tura te mau Orometua ra o Rulon Clive Cook (Tirive), o DeLon Savage (Telona), Daniel Stitt (Daniela) e o Marshall Gordon Bennett (Beneta) na nia i te pahi Farani ra o 'Grenoble' no te ho'i atu i to ratou fenua i muri a'e i to ratou taviniraa i te ohipa a te Fatu i roto i teie nei Misioni. Te tiaturi nei te *Heheuraa Apî* e, na te Atua e tia i e e faaau maitai i to ratou tereraa, ia ore ratou ia roohia e te peapea, e tae noa'tu ratou i to ratou iho mau utuafare.

Marcel BONNET Gérant et Imprimeur, Papeete, Tahiti.
